

МЕСЯЦА ОКТОВРИЯ В 26 ДЕНЬ

**СВЯТАГО И СЛАВНАГО ВЕЛИКОМУЧЕНИКА ДИМИТРИЯ
МИРОТОЧИВАГО
НА ВЕЛИЦЕЙ ВЕЧЕРНЕ**

Стихологисуем, Блажен муж, 1 антифон, 1-ой кафизмы.

На Господи воззвах: стихиры на 8, глас 2

Подобен: Егда от древа:

Светиши отечеству твоему всегда, / Славный Димитрие мучениче, / яко же звезда светлая: / покрываеши бо присно сие от пагубы врагов, / и избавляеши озлобления и бури всякия. / Темже радостно празднует летнюю память блаженне совершаем, / верою же и любовью поя Господа, / тя прославльшаго. **(дважды)**

Мучениче стратотерпче Христов, / чудесы светиши миру якоже солнце, / святе Димитрие: / темже в памяти твоей наслаждаемся / вси твоих чудес блаженне, / изрядная торжествующе верою. / Дерзновение убо имея, / молися ко Господу, спасти от тли и скорбей рабы твоя.

Копиями прободен в ребра, / прободеннаго ради Спаса на кресте в ребра: / Того бо уязвлением любовию поревновал еси, / стратотерпче Димитрие, / являя всем непобедимое свидетельство твоего. / Темже и уязвлен гонитель низпаде, / прием твоего искуса исповедания, / страдальче Христов.

Ины стихиры, глас 8.

Подобен: О преславнаго чудесе:

О преславнаго чудесе! / на небеси и на земли радость / днесь в памяти возсия Димитрия мученика: / от ангел хвалами венчается, / и от человек пение приемлет. / О како пострада! / како добре подвизася! / имже враг паде лукавый, / Христу побеждшу того. **(Дважды)**

О преславнаго чудесе! / чудес светлостью солнца светлейше, / присно Димитрий светит концем, / от невечерняго света облистанный, / и в незаходимем свете красуясь. / Егоже сияньми облацы / отгнани быша варварстии, / недузи прогнашася, и демоны победишася.

О преславнаго чудесе! / Христа ради прободен, / треблаженный Димитрий, / ко врагом всегда явися оружие обоюдоострое, / пожиная врагов вышения, / и низлагая демонская сверепства. / Емуже возопиим: / святой Димитрий, / покрый ны, верно почитающия тя от любве всегда.

Слава, глас 6.

Днесь созывает нас / страстотерпца всемирное торжество. / приидите убо празднующи, / светло празднуем память его, глаголюще: / радуйся, иже ризу нечестия раздрав верою, / мужеством же Духа себе обложив. / Радуйся, упразднитель козней чуждаго, / крепостию, данною тебе от Единого Бога. / Радуйся, иже прободенными удесы, / блаженную страсть Христову духовне нам живописав. / Егоже моли, страдальцев удобрение Димитрие, / избавитися нам видимых / и невидимых враг, / и спаситися душам нашим.

И ныне, Богородичен, глас тойже:

Кто Тебе не ублажит, Пресвятая Дево? / Кто ли не воспоет Твоего Пречистаго Рождества? / Безлетно бо от Отца Возсиявый Сын Единородный, / Тойже от Тебе, Чистая, / пройде, неизреченно воплощая: / естеством Бог Сый и естеством быв Человек нас ради; / не во двою лицу разделяемый, / но во двою естеству неслитно познаваемый. / Того моли, Чистая Всеблаженная, помилуй души наши.

На стиховне.

Слава, глас 8. Анатолия.

Имеет убо божественнейшая твоя душа и непорочная, / приснопамятна Димитрие, / Небесный Иерусалим жилище, / егоже стены пречистыма рукама Невидимаго Бога живописашася. / Имать же всечестное и многострадальнейшее твое тело / презрядный сей храм на земли, / сокровище некрадомое чудес и недугов врачество, / идеже притекающе, цельбы почерпаем. / Соблуди, всехвальне, / тя величающий град от противных приражений, / дерзновение яко имея ко Христу, / Тя прославльшему.

И ныне, Богородичен:

Безвестная Дево, / Яже Бога неизреченно зачещи плотию, / Мати Бога Вышняго, / Твоих рабов мольбы прими, Всенепорочная, / всем подающи очищение прегрешений: / ныне наша моления приемлющи, / моли спаситися всем нам.

На благословении хлебов, тропарь Димитрия, глас 3.

Велика обрете в бедах, / тя поборника вселенная страстотерпче, / языки побеждающая. / Якоже Лиеву низложил еси гордыню, / и на подвиг дерзновенна сотворив Нестора: / тако святе Димитрие Христу Богу молися, / даровати нам велию милость.

Слава, и ныне, Богородичен:

Тя ходатайствовавшую спасение рода нашего, / воспоем, Богородице Дево: / плотию бо от Тебе восприятоу Сын Твой и Бог наш, / Крестом восприим страсть, / избави нас от тли, яко Человеколюбец.